

Ասրան բէգ Սաֆիքիւրդսկին, հեծած առջևի թնդանօթը՝ յաղթական մուտք գործեց Գանձակ:

Յետագային յայտնի դարձաւ, որ այդ յարձակմանը անմասն չէին և վրացի վարիչներէից ոմանք: Յունւ. Ե-ին Ն. Ռամիշվիլին գեկուցանում էր այդ մասին Անդրկ. Կոմիտարիատի նիստին, թէ՛ «Անհրաժեշտ էր գինաթափել Յարսկի Կոլոդցից մեկնած զօրամասը և գէնքը յանձնել վրացական կորպուսին: Ուղարկեց մի զրահապատ և մի զօրամաս... Բոլոր միջոցները ձեռք են առնւած»: Իսկ Զուղելին մատնանշում էր «Արխագալայի և իր զօրամասի կատարած տխուր դերը: Զինաթափում չէր այդ, այլ զինւորների թալան: Դժբախտ ու տանջւած, իրենց տան կարօտը քաշող մարդկանցից խլում էին ամէն ինչ, անգամ կօշիկները: Եւ հէնց տեղն ու տեղն էլ ծախում էին: Աւագակախմբերը ծախում էին գէնքերը: Ինչ որ դարչելի բան էր տեղի ունենում»:\*)

Յունւ. 26-ին, Երկրային Կենտրոնում, նոյն Զուղելին յայտարարեց. «Իսկ ինչ վերաբերում է Շամքորի դէպքերին, ես յայտարարում եմ, որ ընկ. Նոյ Ռամիշվիլին որոշ կապ ունի նրանց հետ: Միայն մի քանի օր այդ տխուր դէպքերից առաջ ընկ. Ռամիշվիլին, ինձ հետ ունեցած խօսակցութեան միջոցին, ասում էր, որ զինաթափութեան համար ամենայնպէս չէր համարում է Արխագալայի զօրամասը: Իմ ցուցմունքները, թէ Արխագալան այդ նպատակի համար պահանջւած վարկը չունի, ըստ երեւոյթին, չօգնեցին, և մենք տեսնում ենք, որ Արխագալան իր զօրամասով ուղարկել է այդ նպատակով: Ըստ երեւոյթին, այդ ուղարկելը չի եղել առանց ընկ. Ռամիշվիլի մասնակցութեան»:

Որուս զօրքերի փախուստի հետեւանքով ամէն կողմից պահանջում էին հայկական զօրամասեր: Պարզ էր դառնում, որ ճակատի պահպանութեան գործում այսուհետեւ առաջին տեղը բռնելու էին հայերը: Կարող էին նրանք կատարել այդ պատմական դերը: Ի՞նչ վիճակ ունէին հայերը զինւորական տեսակէտից:

Դեռ հոկտեմբերեան յեղաշրջումից առաջ, Թիֆլիսի և Պետրոգրադի հայկական կազմակերպութիւնները հարց էին յարուցել, որ Ժամ. Կառավարութիւնը հրահանգէ արեւմտեան ճակատի զօրամասերում գտնուող հայ զինւորներին փոխադրել կովկասեան ճակատ և կազմակերպել հայկական զօրամասեր: Արեւմտեան ճակատում, այն ժամանակւայ հաշւով, կար շուրջ ութսուն հազար հայ զինւոր: Այդ քանակութիւնը՝ միացւած Կովկասում գտնուող գրեթէ նոյնչափ հայ զինւորների հետ, լաւ կազմակերպւած ու մարդկած, տրւած հմուտ հրամանատարութեան ձեռքը, կարող էր վճռական դեր կատարել Թիւրքիայի դէմ:

Զինւորական նախարարն ու բարձր հրամանատարութիւնը ընդառաջ գնացին այս առաջարկութեան և կարգադրեցին հայ զինւորներին համախմբել Թիւրքական ռազմաբեմում, իսկ յուլիս 2 ու 11 հրամաններով կովկասեան ճակատի գլխաւոր հրամանատարը արտօնեց հայկական հրացանա-

\*) «Заря Востока», 1927г. янв. 8, № 6.